

四庫全書

集部

欽定四庫全書

御定全唐詩錄卷三十二

杜甫

九

近體詩

四

鄭駙馬宅宴洞中

主家陰洞細煙霧留客夏簟清琅玕春酒盃濃琥珀薄
冰漿椀碧瑪瑙寒悵疑茅堂過江麓已入風磴霾雲端
自是秦樓壓鄭谷時聞雜佩聲珊珊

題張氏隱居

春山無伴獨相求，伐木丁丁山更幽。
澗道餘寒歷水雪，石門斜日到林丘。
不貪夜識金銀氣，遠害朝看麋鹿遊。
乘興杳然迷出處，對君疑是泛虛舟。

城西陂泛舟

青蛾皓齒在樓船，橫笛短簫悲遠天。
春風自信牙樁動，遲日徐看錦纜牽。
魚吹細浪搖歌扇，燕蹴飛花落舞筵。
不有小舟能盪漿，百壺那送酒如泉。

贈田九判官

崆峒使節上青霄
河隴降王欵聖朝
宛馬總肥春苜蓿
將軍只數漢嫖姚
陳留阮瑀誰爭長
京兆田郎早見招
麾下賴君才並入
獨能無意向漁樵

贈獻納使起居田舍人

獻納司存雨露邊
地分清切任才賢
舍人退食收封事
宮女開函近御筵
曉漏追飛青瑣闥
晴憲點檢白雲篇
揚雄更有河東賦
唯待吹噓送上天

九日藍田崔氏莊

老去悲秋強自寬興來今日盡君歡
羞將短髮還吹帽笑倩傍人為正冠
藍水遠從千澗落玉山高並兩峯寒
明年此會知誰健醉把茱萸子細看

崔氏東山草堂

愛汝玉山草堂靜高秋爽氣相鮮新
有時自發鐘磬響落日更見漁樵人
盤剝白鴉谷口栗飯煮青泥坊底芹
何為西莊王給事柴門空閉鑠松筠

臘日

臘日常年暖尚遙今年臘日凍全消
侵陵雪色還萱草漏洩春光有柳條
縱酒欲謀良夜醉還家初散紫宸朝
口脂面藥隨恩澤翠管銀罌下九霄

紫宸殿退朝口號

戶外昭容紫袖垂雙瞻御座引朝儀
香飄合殿春風轉花覆千官淑景移
晝漏稀聞高閣報天顏有喜近臣知
宮中每出歸東省會送夔龍集鳳池

曲江

一片花飛減却春風飄萬點正愁人且看欲盡花經眼
莫厭傷多酒入唇江上小堂巢翡翠苑邊高塚卧麒麟
細推物理須行樂何用浮名絆此身

朝回日日典春衣每日江頭盡醉歸酒債尋常行處有
人生七十古來稀穿花蛺蝶深深見點水蜻蜓款款飛
傳語風光共流轉暫時相賞莫相違

曲江對酒

苑外江頭坐不歸，水精春殿轉霏微。
桃花細逐楊花落，黃鳥時兼白鳥飛。
縱飲久拚人共棄，懶朝真與世相違。
吏情更覺滄洲遠，老大悲傷未拂衣。

曲江對雨

城上春雲覆苑牆，江亭晚色靜年芳。
林花著雨胭脂落，水荇牽風翠帶長。
龍武新軍深駐輦，芙蓉別殿漫焚香。
何時詔此金錢會，暫醉佳人錦瑟旁。

奉和賈至舍人早朝大明宮

五夜漏聲催曉箭，九重春色醉仙桃。
旌旗日煖龍蛇動，宮殿風微燕雀高。
朝罷香煙攜滿袖，詩成珠玉在揮毫。

欲知世掌絲綸美，池上於今有鳳毛。

雍錄唐都城有三
大內太極宮在西

故名西內大明宮在東故名東內別有興
慶宮號南內三內更迭受朝而大明最數

宣政殿退朝晚出左掖

天門日射黃金榜，春殿晴曛赤羽旗。
宮草霏霏承委珮，鑪烟細細駐遊絲。
雲近蓬萊常五色，雪殘鷓鴣亦多時。
侍臣緩步歸青瑣，退食從容出每遲。

題省中院壁

掖垣竹埤梧十尋洞門對雷常陰陰落花遊絲白日靜
鳴鳩乳燕青春深腐儒衰晚謬通籍退食遲迴違寸心
袞職曾無一字補許身媿比雙南金

曲江陪鄭八丈南史飲

雀啄江頭黃柳花鵲鵲滿晴沙自知白髮非春事
且盡芳尊戀物華近侍即今難浪跡此身那得更無家
丈人文力猶強健豈傍青門學種瓜

送鄭十八虔貶台州司戶傷其臨老陷賊之故關

為面別情見于詩

鄭公擣散鬚成絲酒後常稱老畫師萬里傷心嚴譴日
百年垂死中興時倉惶已就長途往邂逅無端出餞遲

便與先生應永訣九重泉路盡交期

新書虔遷著作郎祿山反遣張通儒劫百

官置東都偽授水部郎中因稱風緩求攝市令潛以密
章達靈武賊平與王維並囚宣陽里然皆善畫崔圓使
繪齋壁虔即祈解于圓卒
免死貶台州司戶參軍

因許八奉寄江寧旻上人

不見旻公三十年封書寄與淚潺湲舊來好事今能否
老去新詩誰與傳碁局動隨幽澗竹架菜憶上泛湖船
聞君話我為官在頭白昏昏只醉眠

題鄭縣亭子

鄭縣亭子澗之濱戶牖憑高發興新雲斷岳蓮臨大路
天晴宮柳暗長春巢邊野雀羣欺燕花底山蜂遠趁人
更欲題詩滿青竹晚來幽獨恐傷神

望岳

西岳峻嶒竦處尊諸峯羅立如兒孫安得仙人九節杖
拄到玉女洗頭盆車箱入谷無歸路箭栝通天有一門
稍待西風涼冷後高尋白帝問真源

至日遣興奉寄北省舊閣老兩院故人

去歲茲辰捧御牀五更三點入鵷行欲知趨走傷心地
正想氤氳滿眼香無路從容陪語笑有時顛倒著衣裳
何人錯憶窮愁日愁日愁隨一線長

憶昨逍遙供奉班去年今日侍龍顏麒麟不動鑪煙上

孔雀徐開扇影還
玉儿由來天北極
朱衣只在殿中間
孤城此日堪腸斷
愁對寒雲雪滿山

蜀相

丞相祠堂何處尋
錦官城外柏森森
映堦碧草自春色
隔葉黃鸝空好音
三顧頻煩天下計
兩朝開濟老臣心
出師未捷身先死
長使英雄淚滿襟

卜居

浣花流水水西頭
主人為卜林塘幽
已知出郭少塵事

更有澄江銷客愁，無數蜻蜓齊上下一雙鷓鴣對沉浮。
東行萬里堪乘興，須向山陰上小舟。

有客

幽棲地僻經過少，老病人扶再拜難。豈有文章驚海內，
漫勞車馬駐江干。竟日淹留佳客坐，百年麤糲腐儒餐。
不嫌野外無供給，乘興還來看藥欄。

狂夫

萬里橋西一草堂，百花潭水即滄浪。風含翠篠娟娟靜，

雨裊紅蕖冉冉香厚祿故人書斷絕恒飢稚子色淒涼
欲填溝壑唯疎放自笑狂夫老更狂

堂成

背郭堂成蔭白茅綠江路熟俯青郊
檉林礙日吟風葉
籠竹和煙滴露梢
暫止飛鳥將數子
頻來語燕定新巢
旁人錯比揚雄宅
懶惰無心作解嘲

進艇

南京久客耕南畝北望傷神坐北窻
晝引老妻乘小艇

晴看稚子浴清江俱飛蛺蝶元相逐並蒂芙蓉本自雙
茗飲蔗漿攜所有瓷甕無謝玉為缸

所思

苦憶荊州醉司馬謫官樽俎定常開九江日落醒何處
一柱觀頭眠幾回可憐懷抱向人盡欲問平安無使來
故憑錦水將雙淚好過瞿塘灩澦堆

江村

清江一曲抱村流長夏江村事事幽自去自來梁上燕

相親相近水中鷗老妻畫紙為碁局稚子敲針作釣鉤
多病所須唯藥物微軀此外更何求

野老

野老籬前江岸迴柴門不正逐江開漁人網集澄潭下
賈客船隨返照來長路關心悲劍閣片雲何意傍琴臺
王師未報收東郡城闕秋生盡角哀

南鄰

錦里先生烏角巾園收芋栗不全貧慣看賓客兒童喜

得食階除鳥雀馴
秋水纔深四五尺
野航恰受兩三人
白沙翠竹江村暮
相送柴門月色新

恨別

洛城一別四千里
胡騎長驅五六年
草木變衰行劍外
兵戈阻絕老江邊
思家步月清宵立
憶弟看雲白日眠
聞道河陽近乘勝
司徒急為破幽燕

和裴迪登蜀州東亭送客逢早梅相憶見寄

東閣官梅動詩興
還如何遜在揚州
此時對雪遙相憶

送客逢春可自由，幸不折來傷歲暮。
若為看去亂鄉愁，江邊一樹垂垂發。
朝夕催人自白頭。

暮登西安寺鐘樓寄裴十叟

暮倚高樓對雪峯，僧來不語自鳴鐘。
孤城返照紅將歛，近市浮煙翠且重。
多病獨愁常聞寂，故人相見未從容。
知君苦思緣詩瘦，太向交游萬事慵。

客至

喜崔明府相過

舍南舍北皆春水，但見羣鷗日日來。
花徑不曾緣客掃。

蓬門今始為君開盤飧市遠無兼味樽酒家貧只舊醅
肯與鄰翁相對飲隔籬呼取盡餘盃

江上值水如海勢聊短述

為人性僻耽佳句語不驚人死不休老去詩篇渾漫興
春來花鳥莫深愁新添水檻供垂釣故著浮槎替入舟
焉得思如陶謝手令渠述作與同遊

寄杜位

近聞寬法離新州想見懷歸尚百憂逐客雖皆萬里去

悲君已是十年流，干戈況復塵隨眼。
鬢髮還應雪滿頭，玉壘題書心緒亂。
何時更得曲江遊。

送韓十四江東覲省

兵戈不見老萊衣，歎息人間萬事非。
我已無家尋弟妹，君今何處訪庭闈。
黃牛峽靜灘聲轉，白馬江寒樹影稀。
此別應須各努力，故鄉猶恐未同歸。

王十七侍御掄許攜酒至草堂奉寄此詩便請邀
高三十五使君同到

老夫卧穩朝慵起
白屋寒多暖始開
江鶴巧當幽徑浴
鄰雞還過短牆來
繡衣屢許攜家醞
卓蓋能忘折野梅
戲假霜威促山簡
須成一醉習池迴

野人送朱櫻

西蜀櫻桃也自紅
野人相贈滿筠籠
數迴細寫愁仍破
萬顆勻圓訝許同
憶昨賜露門下省
退朝擎出大明宮
金盤玉筋無消息
此日嘗新任轉蓬

題桃樹

小徑升堂舊不斜，五株桃樹亦從遮。
高秋總餽貧人實，來歲還舒滿眼花。
簾戶每宜通乳燕，兒童莫信打慈鴉。
寡妻羣盜非今日，天下車書正一家。

嚴中丞枉駕見過

元戎小隊出郊坰，問柳尋花到野亭。
川合東西瞻使節，地分南北任流萍。
扁舟不獨如張翰，卓帽還應似管寧。
寂寞江天雲霧裏，何人道有少微星。

野望

西山白雪三城戍南浦清江萬里橋海內風塵諸弟隔
天涯涕淚一身遙唯將遲暮供多病未有涓埃答聖朝
跨馬出郊時極目不堪人事日蕭條

奉酬嚴公寄題野亭之作

拾遺曾奏數行書懶性從來水竹居奉引濫騎沙苑馬
幽棲真釣錦江魚謝安不倦登臨費阮籍焉知禮法疎
枉沐旌麾出城府草茅荒徑欲教鋤

嚴公仲夏枉駕草堂兼攜酒餼

竹裏行廚洗玉盤
花邊立馬簇金鞍
非關使者徵求急
自識將軍禮數寬
百年地僻柴門迴
五月江深草閣寒
看弄漁舟移白日
老農何有罄交歡

黃草

黃草峽西船不歸
赤甲山下行人稀
秦中驛使無消息
蜀道兵戈有是非
萬里秋風吹錦水
誰家別淚濕羅衣
莫愁劍閣終堪據
聞道松州已被圍

秋盡

秋盡東行且未迴茅齋寄在少城隈籬邊老却陶潛菊
江上徒逢袁紹盃雪嶺獨看西日落劍門猶阻北人來
不辭萬里長為客懷抱何時得好開

野望

金華山北涪水西仲冬風日始淒淒山連越嶺蟠三蜀
水散巴渝下五溪獨鶴不知何事舞飢鳥似欲向人啼
射洪春酒寒仍綠目極傷神誰為攜

聞官軍收河南河北

劍外忽傳收薊北初聞涕淚滿衣裳却看妻子愁何在
漫卷詩書喜欲狂白日放歌須縱酒青春作伴好還鄉
即從巴峽穿巫峽便下襄陽向洛陽

送路六侍御入朝

童稚親情四十年中間消息兩茫然更為後會知何地
忽漫相逢是別筵不分桃花紅勝錦生憎柳絮白於綿
劍南春色還無賴觸忤愁人到酒邊

涪城縣香積寺官閣

寺下春江深不流山腰官閣迴添愁含風翠壁孤雲細
背日丹楓萬木稠小院迴廊春寂寂浴鳧飛鷺晚悠悠
諸天合在藤蘿外昏黑應須到上頭

送王十五判官扶侍還黔中

大家東征逐子迴風生洲渚錦帆開青青竹筍迎船出
白白江魚入饌來離別不堪無限意艱危深仗濟時才
黔陽信使應稀少莫怪頻頻勸酒盃

登高

風急天高猿嘯哀，渚清沙白鳥飛迴。
無邊落木蕭蕭下，不盡長江滾滾來。
萬里悲秋常作客，百年多病獨登臺。
艱難苦恨繁霜鬢，潦倒新停濁酒杯。

九日

去年登高鄴縣北，今日重在涪江濱。
苦遭白髮不相放，羞見黃花無數新。
世亂鬱鬱久為客，路難悠悠常傍人。
酒闌却憶十年事，腸斷驪山清路塵。

章梓州橘亭餞成都賓少尹

秋日野亭千橘香玉杯錦席高雲涼主人送客何所作
行酒賦詩殊未央衰老應為難離別賢聲此去有輝光
預傳籍籍新京尹青史無勞數趙張

奉待嚴大夫

殊方又喜故人來重鎮還須濟世才常怪偏裨終日待
不知旌節隔年迴欲辭巴徼啼鶯合遠下荆門去鷓催
身老時危思會面一生襟抱向誰開

奉寄高常侍

汶上相逢年頗多，飛騰無那故人何。
總戎楚蜀應全未，方駕曹劉不啻過。
今日朝廷須汲黯，中原將帥憶廉頗。
天涯春色催遲暮，別淚遙添錦水波。

將赴荆南寄別李劍州

使君高義驅今古，寥落三年坐劍州。
但見文翁能化俗，焉知李廣未封侯。
路經灩澦雙蓬鬢，天入滄浪一釣舟。
戎馬相逢更何日，春風回首仲宣樓。

奉寄別馬巴州

勲業終歸馬伏波功曹非復漢蕭何扁舟繫纜沙邊久
南國浮雲水上多獨把魚竿終遠去難隨鳥翼一相遇
知君未愛春湖色興在驪駒白玉珂

滕王亭子

君王臺榭枕巴山萬丈丹梯尚可攀春日鶯啼修竹裏
仙家犬吠白雲間清江錦石傷心麗嫩蘂濃花滿目斑
人到於今歌出牧來遊此地不知還

玉臺觀

滕王造

中天積翠玉臺遙上帝高居絳節朝遂有馮夷來擊鼓
始知羸女善吹簫江光隱見鼉鼉窟石勢參差烏鵲橋
更宥紅顏生羽翼便應黃髮老漁樵

將赴成都草堂途中有作先寄嚴鄭公

得歸茅屋赴成都直為文翁再剖符但使閭閻還揖讓
敢論松竹久荒蕪魚知丙穴由來美酒憶郫筒不用酤
五馬舊曾諳小徑幾回書札待潛夫

處處青江帶白蘋故園猶得見殘春雪山斥堠無兵馬

錦里逢迎有主人，休怪兒童延俗客。
不教鶯鴨惱比鄰，習池未覺風流盡。
況復荊州賞更新。

竹寒沙碧浣花溪，橘刺藤梢咫尺迷。
過客徑須愁出入，居人不自解東西。
書籤藥裹封蛛網，野店山橋送馬蹄。
宵藉荒唐春草色，先拚一飲醉如泥。

常苦沙崩損藥欄，也從江檻落風湍。
新松恨不高千尺，惡竹應須斬萬竿。
生理祇憑黃閣老，衰顏欲付紫金丹。
三年奔走空皮骨，信有人間行路難。

錦官城西生事微，烏皮几在還思歸。昔去為憂亂兵入，
今來已恐鄰人非。側身天地更懷古，迴首風塵甘息機。
共說總戎雲鳥陣，不妨遊子芰荷衣。

登樓

花近高樓傷客心，萬方多難此登臨。錦江春色來天地，
玉壘浮雲變古今。北極朝廷終不改，西山寇盜莫相侵。
可憐後主還祠廟，日暮聊為梁甫吟。

院中晚晴懷西郭茅舍

幕府秋風日夜清澹雲疎雨過高城葉心未實看時落
階面青苔先自生復有樓臺銜暮景不勞鐘鼓報新晴
浣花溪裏花饒笑肯信吾兼吏隱名

宿府

清秋幕府井梧寒獨宿江城蠟炬殘永夜角聲悲自語
中天月色好誰看風塵荏苒音書絕關塞蕭條行路難
已忍伶俜十年事強移栖息一枝安

至後

冬至至後日初長遠在劍南思洛陽青袍白馬有何意
金谷銅駝非故鄉梅花欲開不自覺棣萼一別永相望
愁極本憑詩遣興詩成吟詠轉淒涼

撥悶

聞道雲安麴米春纔傾一盞即醺人乘舟取醉非難事
下峽消愁定幾巡長年三老遙憐汝捩柁開頭捷有神
已辦青錢防雇直當令美味入吾脣

十二月一日

今朝臘月春意動雲安縣前江可憐一聲何處送書雁
百丈誰家上水船未將梅蘂驚愁眼要取楸花媚遠天
明光起草人所羨肺病幾時朝日邊

寒輕市上山煙碧日滿樓前江霧黃負鹽出井此谿女
打鼓發船何郡郎新亭舉目風景切茂陵著書消渴長
春花不愁不爛漫楚客唯聽棹相將

即看燕子入山扉豈有黃鸝歷翠微短短桃花臨水岸
輕輕柳絮點人衣春來準擬開懷久老去親知見面稀

他日一盃難強進重嗟筋力故山違

立春

春日春盤細生菜忽憶兩京梅發時盤出高門行白玉
菜傳纖手送青絲巫峽寒江那對眼杜陵遠客不勝悲
此身未知歸定處呼兒覓紙一題詩

寄常徵君

白水青山空復春徵君晚節傍風塵楚妃堂上色殊衆
海鶴階前鳴向人萬事糾紛猶絕粒一官羈絆實藏身

開州入夏知涼冷不似雲安毒熱新

崔評事弟許相迎不到應慮老夫見泥雨怯出必

愆佳期走筆戲簡

江閣要賓許馬迎午時起坐自天明浮雲不負青春色
細雨何孤白帝城身過花間霑濕好醉於馬上往來輕
虛疑皓首衝泥怯實少銀鞍傍險行

閣夜

歲暮陰陽催短景天涯霜雪霽寒宵五更鼓角聲悲壯

三峽星河影動搖野哭千家聞戰伐夷歌數處起漁樵
卧龍躍馬終黃土人事依依漫寂寥

灩澦

灩澦既没孤根深西來水多愁太陰江天漠漠鳥雙去
風雨時時龍一吟舟人漁子歌迴首估客胡商淚滿襟
寄語舟航惡年少休翻鹽井擲黃金

白帝

白帝城中雲出門白帝城下雨翻盆高江急峽雷霆鬪

翠木蒼藤日月昏戎馬不如歸馬逸千家今有百家存
哀哀寡婦誅求盡慟哭秋原何處村

白帝城最高樓

城尖徑昃旌旒愁獨立縹緲之飛樓峽坼雲霾龍虎卧
江清日抱鼉鼉遊扶桑西枝封斷石弱水東影隨長流
杖藜歎世者誰子泣血迸空迴白頭

秋興八首

箋曰此詩舊箋未悉影略其篇章次第鉤鎖開闔今要而言之玉露凋傷一章秋興之發端也

江間塞上狀其悲壯叢菊孤舟寫其悽緊末二
句結上生下故即慶府孤城次之絕塞高城抄
秋薄暮俄看落日俄見南斗爐烟燭而哀猿號
急杵斷而悲笳發蘿月蘆花淒清滿眼蕭辰遙
夜攢簇一時請看二字緊映每依南斗即連上
城高暮砧當句呼應耳夜夜如此朝朝亦然日
日如此信宿亦然心抱南斗京華之思身與漁
人燕子為侶遠則匡衡劉向之不如近則同學
輕肥之相笑第三章正申秋興名篇之意古人
所謂文之心也然每依南斗望京華一句是三
章中吃緊齧節蕭條歲晚身事如此長安棋局
世事如此企望京華平居寂寞故曰百年世事
不勝悲也次下乃重章以申之蓬萊宮闕一章
思全盛日之長安也瞿唐峽口一章思陷沒後
之長安也昆明池水一章思自古帝王之長安
也昆明御宿一章思承平昔遊之長安也由瞿

唐烏道之區指曲江禁近之地兵塵秋氣萬里
連延首章即云塞上風雲接地陰也唐時遊幸
莫盛於曲江故悲陷沒則先舉曲江漢朝形勝
莫壯於昆明故追隆古則特舉昆明曰漢時曰
武帝正尅指自古帝王也此章益感嘆遺蹟企
想其妍麗而自傷遠不得見乃疊申曲江末句
文勢了然今以為樂指喪亂則迂矣天寶之禍
干戈滿地營壘俱在國西及郭令收西京陳於
香積寺北澧水之東皆漢上林苑地在昆明御
宿之間然城南故地風景無恙故曰自逶迤也
碧梧紅豆秋色依然拾翠同舟春遊如昨追緣
筆於壯盛感星象於至尊豈非神遊化人夢迴
帝所低垂吟望至是而秋興之能事畢矣此詩
一事疊為八章章雖有八重重鈞攝餘義更有
無量樓閣門在
於分章下詳之

玉露凋傷楓樹林巫山巫峽氣蕭森江間波浪兼天湧

塞上風雲接地陰叢菊兩開他日淚孤舟一繫故園心

寒衣處處催刀尺白帝城高急暮砧

箋曰招魂曰湛湛江水今上有楓樹

日千里兮傷春心宋玉以楓樹之茂盛傷心此以楓樹之凋傷起興也又曰江間洶湧則上接風雲塞上陰森則下連波浪此所謂悲壯也叢菊兩開儲別淚於他日孤舟一繫儼歸心於故園此所謂悽緊也秋夜客舍詩云南菊再逢人卧病公在夔府兩見菊花故有兩開之句舊箋指樊川故里之菊非也九日詩云繫舟身萬里孤舟一繫即已辦故園之心矣所謂遠望當歸也以節則杪秋以地則高城以時則薄暮刀尺苦寒急砧促別未句標舉會略有五重所謂嗟峨蕭瑟真不可言公孫白帝城亦英雄割據之地此地開砧尤為悽斷上白

帝城詩云老去聞
悲角意亦如此

夔府孤城落日斜每依南斗望京華
聽猿實下三聲淚
奉使虛隨八月查
畫省香爐違伏枕
山樓粉堞隱悲笳

請看石上藤蘿月已映洲前蘆荻花

箋曰孤城落日悵望京華曰每依南

斗蓋無夕而不然也石上之月已映藤蘿又是依斗望
京之候矣請看二字緊映每字無限淒斷見於言外如
云又過却一日矣不知何日得見京華也又曰每依南
斗望京華皎然所謂截斷衆流句也孤城砧斷日薄
虞淵萬里孤臣翹首京國雖復八表昏黃絕塞慘澹唯
此望闕寸心與南斗共芒色耳此句為八首之綱骨章
重文叠不出於此聽猿奉使伏枕悲笳遙夜慳悽莫可
為喻然石上藤蘿之月已映洲前蘆荻之花矣莫遂謂

長夜漫漫何時旦也細思請看二字更是不覺乍見訝而嘆之之詞作如是解此二字喚起有力此翁老不忘君千歲而下可以相泣也

千家山郭靜朝暉日日江樓坐翠微信宿漁人還汎汎清秋燕子故飛飛匡衡抗疏功名薄劉向傳經心事違

同學少年多不賤五陵衣馬自輕肥

箋曰漁人燕子即所見以自傷也亦

以自況也公抗疏不減匡衡而近侍移官一斤不復故曰功名薄若劉向雖數奏封事不用而猶居近侍典故五經公則白頭幕府深愧平生故曰心事違也七歌云長安御相多少年所謂同學者蓋長安御相也曰少年曰輕肥公之目當時御相如此又曰山郭千家朝暉冷靜寫出夔府孤城也信宿漁人不但自況以其延緣荻

葦搗家嘯歌羈樓之客殆有弗如還汎汎者亦羨之
詞也九辯曰燕翩翩其辭歸兮蟬寂寞而無聲以燕遇
秋寒迴翔而畏懼也故以清秋日之燕燕子飛詩人取
喻送別已則繫舟伏枕而燕乃下上辭歸飛翔促數攪
余心焉曰故飛飛者惱亂之辭亦觸忤也抗疏之功名
既薄傳經之心事又違旋觀同學少年五陵衣馬亦漁
人燕子之儔侶耳故以自輕肥薄之下一自字與還汎
汎故飛飛翻倒相應杜陵有布衣老大心轉拙於長安
卿相何有哉

聞道長安似奕棋百年世事不勝悲王侯第宅皆新主
文武衣冠異昔時直北關山金鼓振征西車馬羽書遲
魚龍寂寞秋江冷故國平居有所思

箋曰長安似奕棋
言謀國者如奕棋

之無定算故貽禍於百年之後而不勝其悲也百年世事用辛有之言王侯第宅指誤國之人如林甫國忠輩也明皇寵任蕃將而肅宗信向中官俾居朝右文武衣冠皆異於昔時也所謂百年世事者如此人曰肅宗收京已後委任中官中外多故公不以移官僻遠愆置君國之憂故有聞道長安之章每依南斗望京華情見於此白帝城高日以故國兼天波浪嘆彼魚龍曰平居有所思殆欲以滄江遺老奮袖屈指覆定百年舉棋之局非徒悲傷晚晚如昔人願得入帝城而已

蓬萊宮闕對南山承露金莖霄漢間西望瑤池降王母
東來紫氣滿函關雲移雉尾開宮扇日繞龍鱗識聖顏

一卧滄江驚歲晚幾回青鎖點朝班

箋曰公詩云憶獻
三賦蓬萊宮此記

其事也王母函闕記天寶承平盛事而失政亦略見矣
雲移二句記朝儀之盛曰識聖顏者公以布衣朝見所
謂往時文彩動人主也落句方及拾遺移官之事又曰
此詩乃追思長安全盛叙迷宮闕崇麗朝省尊嚴而感
傷則見於末句蓋自靈武迴鑾放逐蜀郡舊臣自此中
官竊柄開元天寶之盛事不可復見而公生此移官滄
江歲晚能無三嘆於今昔乎幾回青鎖追數其近侍奉
引時日無幾也嗟乎西望瑤池以下開寶之長安也王
侯第宅以下肅宗之長安也徘徊感歎亦所謂重章而共述也

瞿唐峽口曲江頭萬里風煙接素秋花萼夾城通御氣

芙蓉小苑入邊愁朱簾繡柱圍黃鶴錦纜牙檣起白鷗

迴首可憐歌舞地秦中自古帝王州

箋曰此記長安失陷之事也明皇自

秦幸蜀故有瞿唐曲江萬里風煙之感蓋明皇幸蜀正
八月也入邊愁并指吐蕃陷長安也歌舞樂遊之地一
切殘毀則宗廟宮闕不言而可知矣又曰開元中廣花
萼樓築夾城複道自南內徑達曲江芙蓉園亂後崩墮
游幸絕跡故曰通御氣也祿山反報至上欲遷幸登興
慶宮花萼樓置酒四顧悽愴此所謂入邊愁也舊箋謂
并指吐蕃陷長安非也珠簾繡柱指陸地帝幕之妍華
錦纜牙檣指水嬉擢柁之炫耀哀江頭云江頭宮殿鎖
千門此則痛定而追思長安天府三成帝畿故曰周以
龍興秦以虎視至有唐而燕寇長驅落句之意以為樂
游歌舞之地逸豫不戒馴至風煙灰燼王仲宣七哀
云南登灞陵岸回首望長安迴首之言良可深省

昆明池水漢時功武帝旌旗在眼中織女機絲虛月夜

石鯨鱗甲動秋風波漂菰米沉雲黑露冷蓮房墜粉紅

關塞極天唯鳥道江湖滿地一漁翁

箋曰此借武帝以喻明皇也兵車行

云武王開邊意未已韋應物詩云少事武皇帝唐人皆然又曰今人論唐七言長句推老杜昆明池水為冠寶不解此詩所以佳楊用修曰觀西京雜記三輔黃圖所載則知盛世殷富之景觀織女機絲四句則知兵火凋殘之狀此亦強作解事耳叙昆明之勝者莫如孟堅平子一則曰集乎豫章之館臨乎昆明之池左牽牛而右織女若雲漢之無涯一則曰豫章珍館揭焉中峙牽牛立其左織女處其右日月於是乎出入象扶桑與濛汜此用修所誇盛世之文也班張以漢人叙漢事鋪陳名勝故有雲漢日月之言公以唐人叙漢事摩娑陳迹故有機絲夜月之詞此立言之體也何謂彼頌繁華而此傷喪亂乎菰米蓮房補班張鋪叙所未見沉雲墜粉描畫素秋景物居然金碧粉本昆池水黑故賦言黑水元趾菰米沉沉象池水之黑極言其繁殖也用修言兵火

殘破菰米漂沈不收不已倍乎舊箋謂借漢武以喻明
皇指武皇開邊為證明皇雖興兵南詔未嘗如武帝穿
昆明以習戰安得有旌旗在眼之語兵車行前後出塞
諷諫窮兵者多矣安用於此中致譏豈主文譎諫之義
乎今謂昆明一章繫承上章秦中自古帝王州一句而
申言之時則曰漢時帝則曰武帝織女石鯨蓮房菰米
金陵靈沼之遺蹟與戈船樓櫓並在眼中而自傷其辭
遠而不得見也於上章末句尅指其來脈則此中叙致
攝壹環鎖了然分明如是而曰七言長句果以此詩為
首知此老亦為點頭矣末二句正寫所思之沉闕塞極
天豈非風烟萬里滿地一漁翁即信宿泛泛之漁
人耳上下俛仰亦在眼中謂公自指一漁翁則陋

昆吾御宿自逶迤紫閣峰陰入漢陂香稻啄餘鸚鵡粒
碧梧棲老鳳凰枝佳人拾翠春相問仙侶同舟晚更移

彩筆昔遊千氣象白頭吟望苦低垂

箋曰此記遊宴漢陂之事也仙侶同

舟指岑參兄弟也公詩云氣衝星象表詩感帝王尊所謂綵筆昔遊千氣象也公與岑參輩宴遊在天寶獻賦

之後窮老追思故有白頭吟望之嘆馬又曰箋以為思

昔遊之長安是矣今更指昔遊之地謂亦連躡上章而

來蓋武帝建元中微行數出廣開上林東南至宜春鼎

湖昆吾御宿北繞黃山周袤數百里元狩三年始穿昆

明池以象滇河今詩昆吾御宿二句正指武帝所開城

南故地言自逶迤者躡昆明池水言之謂不獨穿鑿昆

明為武帝之功凡上林黃山之間更衣禁禦建置歷然

亦皆如昆明旗幟常在眼中也秦州自古帝王一句亦

總結於此蓋事訖而重

申亦章重而事別矣

御定全唐詩錄卷三十二

欽定四庫全書

集部

御定全唐詩錄卷三十三
四

詳校官左中允_臣 瑋五珠

主事銜臣徐以坤覆勘

總校官原任中允_臣 王燕緒

校對官中書_臣 嵇承志

謄錄監生_臣 胡宗高

謄錄監生_臣 張元功

欽定四庫全書

御定全唐詩錄卷三十三

杜甫

十

近體詩

五

詠懷古跡

支離東北風塵際
漂泊西南天地間
三峽樓臺淹日月
五溪衣服共雲山
羯胡事主終無賴
詞客哀時且未還
庾信平生最蕭瑟
暮年詩賦動江關

搖落深知宋玉悲，風流儒雅亦吾師。
悵望千秋一灑淚，蕭條異代不同時。
江山故宅空文藻，雲雨荒臺豈夢思。
最是楚宮俱泯滅，舟人指點到今疑。

羣山萬壑赴荆門，生長明妃尚有村。
一去紫臺連朔漠，獨留青塚向黃昏。
畫圖省識春風面，環珮空歸月夜魂。
千載琵琶作胡語，分明怨恨曲中論。

蜀主窺吳幸，三峽崩年亦在永安宮。
翠華想像空山裏，玉殿虛無野寺中。
古廟杉松巢水鶴，歲時伏臘走村翁。

武侯祠屋常鄰近一體君臣祭祀同

諸葛大名垂宇宙宗臣遺像肅清高三分割據紆籌策
萬古雲霄一羽毛伯仲之間見伊呂指揮若定失蕭曹
運移漢祚難恢復志決身殲軍務勞

諸將

漢朝陵墓對南山胡鹵千秋尚入關昨日玉魚蒙葬地
早時金盃出人間見愁汗馬西戎逼曾閃朱旗北斗殷
多少材官守涇渭將軍且莫破愁顏

韓公本意築三城擬絕天驕拔漢旌豈謂盡煩回紇馬
翻然遠救朔方兵胡來不覺潼關隘龍起猶聞晉水清

獨使至尊憂社稷諸君何以答昇平

箋曰當景龍之時張仁願築城胡腹

中制其南牧猶以狼居瀚海絕幕未空為恨不及百年
而祿山作逆回鶻助順堂堂中夏借力於彼以資匡復
國勢之寢衰如此邊事之倒置如此不亦傷乎是以悲
潼關之失隘思唐堯之一旅勸勉河北諸將不應無韓
公之老謀而以賊遺君父也往余沿襲舊聞謂責諸將
不應借助於回紇當盜發幽陵天子西走汾陽提朔方
孤軍轉戰逐北香積之翦伏西嶺之却迴非回紇協力
奮擊或出其背或出其後勝負未決兩都之收復未可
知也當此之時能預料其怙恩肆掠逆而拒之乎魏勃
曰失火之家當先白大人後救火乎此切諭也故吾謂

豈謂盡煩云云乃俯仰感嘆之詞非以是為謀國不臧
而有所彈刺也有言末章二句屬勸勉汾陽之詞汾陽
自相州罷歸部曲離散承詔日度下才數十騎僅免於
朝恩元振交口嘗嗤少陵於此時惜之可也訟之可也
又何庸執三寸之管把其短長乎新書亦謂太宗能用
突厥而肅宗不能用回紇兔園書生不識世務鈔略論
斷妄談兵事如此類者皆可以一笑也

洛陽宮殿化為烽休道秦關百二重滄海未全歸禹貢

薊門何處盡堯封朝廷衮職雖多預天下軍儲不自供

稍喜臨邊王相國肯銷金甲事春農

箋曰此責朝廷之
大臣出將者也將

相大臣當安危重任不思何以歸職貢復封疆補衮職
於朝廷供軍儲於天下如王縉者不過募耕勸農修承

平有司之職業而已曰稍喜者蓋深致不滿之意非褒詞也朝廷衮職思得中興賢佐如仲山甫以補衮闕非尋常諫諍之謂也

回首扶桑銅柱標冥冥氛祲未全銷越裳翡翠無消息

南海明珠久寂寥殊錫曾為大司馬總戎皆插侍中貂

炎風朔雪天王地只在忠良翊聖朝

箋曰此深戒朝廷不當使中官出將

也楊思勗討安南五溪殘酷好殺故越裳不貢呂太一收珠南海阻兵作亂故南海不靖李輔國以中官拜大司馬所謂殊錫也魚朝恩等以中官為觀軍容使所謂總戎也炎風朔雪皆天王之地只當精求忠良以翊聖朝安得偏信一二中人據將帥之重任自取潰僨乎肅代間國勢衰弱不復再振其根本胥在於此斯豈非忠

規切諫救世
之針藥與

錦江春色逐人來
巫峽清秋萬壑哀
正憶往時嚴僕射

共迎中使望鄉臺
主恩前後三持節
軍令分明數舉杯

西蜀地形天下險
安危須仗出羣材

箋曰此言蜀中將帥也崔旰殺郭英

又栢茂林李昌夔楊子琳舉兵討旰蜀中大亂杜鴻漸受命鎮蜀旰旰數薦于朝請以節制讓旰茂琳等各為本州刺史上不得已從之鴻漸以宰相兼成都尹劍南東西川副元帥主恩隆于嚴武而畏怯憚旰反委以任日置酒高會姑息養亂有媿前鎮多矣公詩標巫峽錦江指西蜀之地形也曰正憶曰往時感今而指昔也主恩則是而軍令則非昔人之三杯何如今人之縱飲如武者真出羣之材安危可寄而今非其人可知也公身

居蜀中而風刺出鎮之宗袞故指遠而詞文如此韓純玉曰首章責諸將之防邊者次章責諸將之用回紇者三章刺大臣之出將者四章戒中官之出將者末章則因身在蜀中而婉刺鎮蜀之將也故樞命其題曰諸將

夜

露下天高秋水清
空山獨夜旅魂驚
疎燈自照孤帆宿
新月猶懸雙杵鳴
南菊再逢人卧病
北書不至雁無情
步檐倚杖看牛斗
銀漢遙遙接鳳城

暮春

卧病擁塞在峽中
瀟湘洞庭虛映空
楚天不斷四時雨
巫峽常吹千里風
沙上草閣柳新闌
城邊野池蓮欲紅
暮春鴛鴦立洲渚
挾子翻飛還一叢

返照

楚王宮北正黃昏
白帝城西過雨痕
返照入江翻石壁
歸雲擁樹失山村
衰年肺病唯高枕
絕塞愁時早閉門
不可久留豺虎亂
南方實有未招魂

九日

重陽獨酌盃中酒抱病起登江上臺竹葉於人既無分
菊花從此不須開殊方日落玄猿哭舊國霜前白雁來
弟妹蕭條各何往干戈衰謝兩相催

冬至

年年至日長為客忽忽窮愁泥殺人江上形容吾獨老
天邊風俗自相親杖藜雪後臨丹壑鳴玉朝來散紫宸
心折此時無一寸路迷何處見三秦

小至

天時人事日相催
冬至陽生春又來
刺繡五紋添弱線
吹葭六琯動浮灰
岸容待臘將舒柳
山意衝寒欲放梅
雲物不殊鄉國異
教兒且覆掌中杯

覽物

曾為掾吏趨三輔
憶在潼關詩興多
巫峽忽如瞻華岳
蜀江猶似見黃河
舟中得病移衾枕
洞口經春長薜蘿
形勝有餘風土惡
幾時迴首一高歌

愁

強戲為
吳體

江草日日喚愁生，巫峽泠泠非世情。
盤渦鷺浴底心性，獨樹花發自分明。
十年戎馬暗萬國，異域賓客老孤城。
渭水秦山得見否，人今罷病虎縱橫。

晝夢

二月饒睡昏昏然，不獨夜短晝分眠。
桃花氣暖眼自醉，春渚日落夢相牽。
故鄉門巷荆棘底，中原君臣豺虎邊。
安得務農息戰鬪，普天無吏橫索錢。

即事

暮春三月巫峽長
晶晶行雲浮日光
雷聲忽送千峯雨
花氣渾如百和香
黃鶯過水翻迴去
燕子銜泥濕不妨
飛閣捲簾圖畫裏
虛無只少對瀟湘

即事

天畔羣山孤草亭
江中風浪雨冥冥
一雙白魚不受釣
三寸黃柑猶自青
多病馬卿無日起
窮途阮籍幾時醒
未聞細柳散金甲
腸斷秦川流濁涇

舍弟觀赴藍田取妻子到江陵喜寄

汝迎妻子達荊州消息真傳解我憂
鴻雁影來連峽內
鵲鴿飛急到沙頭
嶢關險路今虛遠
禹鑿寒江正穩流
朱紱即當隨綵鷁
青春不假報黃牛

馬度秦關雪正深
北來肌骨苦寒侵
他鄉就我生春色
故國移居見客心
剩欲提攜如意舞
喜多行坐白頭吟
巡簷索共梅花笑
冷藥疎枝半不禁

庾信羅含俱有宅
春來秋去作誰家
短牆若在從殘草
喬木如存可假花
卜築應同蔣詡徑
為園須似邵平瓜

比年病酒開涓滴弟勸兄酬何怨嗟

江雨有懷鄭典設

春雨閭閻塞峽中早晚來自楚王宮
亂波分披已打岸弱雲狼籍不禁風
寵光蕙葉與多碧點注桃花舒小紅
谷口子真正憶汝岸高瀼滑限西東

七月一日題終明府水樓

高棟層軒已自涼秋風此日灑衣裳
脩然欲下陰山雪不去非無漢署香
絕壁過雲開錦繡疎松夾水奏笙簧

看君宜著王喬履真賜還疑出尚方

終明府功曹也兼攝奉節令故有此

句竹觀奏

即真也

宓子彈琴邑宰日終軍棄繻英妙時承家節操尚不泯
為政風流今在茲可憐賓客盡傾蓋何處老翁來賦詩
楚江巫峽半雲雨清簾疎簾看奕碁

又呈吳郎

堂前撲棗任西鄰無食無兒一婦人不為困窮寧有此
祇緣恐懼轉須親即防遠客雖多事使插疎籬却甚真

已訴徵求貧到骨正思戎馬淚盈巾

覃山人隱居

南極老人自有星北山移文誰勒銘徵君已去獨松菊
哀壑無光留戶庭予見亂離不得已子知出處必須經

高車馬帶傾覆悵望秋天虛翠屏

韓純玉曰此詩明是譏諷語嘆山人

之不終隱也其曰徵君已去哀壑無光帶傾覆虛翠屏已是一篇北山移文矣

送李八秘書赴杜相公幕

青簾白舫益州來巫峽秋濤天地迴石出倒聽楓葉下

櫓搖背指菊花開貪趨相府今晨發恐失佳期後命催
南極一星朝北斗五雲多處是三台

季夏送鄉弟韶陪黃門從叔朝謁

令弟尚為蒼水使名家莫出杜陵人比來相國兼安蜀
歸赴朝廷已入秦捨舟策馬論兵地拖玉晉金報主身
莫度清秋吟蟋蟀早聞黃閣畫麒麟

見螢火

巫山秋夜螢火飛簾疎巧入坐人衣忽驚屋裏琴書冷

復亂簷邊星宿稀却繞井欄添箇箇偶經花葉弄輝輝
滄江白髮愁看汝來歲如今歸未歸

吹笛

吹笛秋山風月清誰家巧作斷腸聲風飄律呂相和切
月傍關山幾處明胡騎中宵堪北走武陵一曲想南征
故園楊柳今搖落何得愁中却盡生

見王監兵馬使說近山有白黑二鷹羅者久取竟
未能得王以為毛骨有異他鷹恐臘後春生鶩

飛避暖勁翮思秋之甚眇不可見請余賦詩

雪飛玉立盡清秋不惜竒毛恣遠遊在野只教心力破
于人何事網羅求一生自獵知無敵百中爭能恥下鞫
鵬礙九天須却避免藏三穴莫深憂

黑鷹不省人間有度海疑從北極來正翮搏風超紫塞
立冬幾夜宿陽臺虞羅自各虛施巧春雁同歸必見猜
萬里寒空祇一日金眸玉爪不凡材

人日

此日此時人共得一談一笑俗相看尊前栢葉休隨酒
勝裏金花巧耐寒佩劍衝星聊暫拔匣琴流水自須彈
早春重引江湖興直道無憂行路難

奉送蜀州栢二別駕將中丞命赴江陵起居衛尚
書太夫人因示從弟行軍司馬佐

中丞問俗盡熊頻愛弟傳書彩鷁新遷轉五州防禦使
起居八座太夫人楚宮臘送荆門水白帝雲偷碧海春
報與惠連詩不惜知吾斑鬢總如銀

多病執熱奉懷李尚書

衰年正苦病侵凌
首夏何須氣鬱蒸
大水淼茫炎海接
奇峯硤兀火雲升
思霑道暍黃梅雨
敢望宮恩玉井冰
不是尚書期不顧
山陰野雪興難乘

江陵節度陽城郡王新樓成王請嚴侍御判官賦

七字句同作

樓上炎天冰雪生
高飛燕雀賀新成
碧窻宿霧濛濛濕
朱拱浮雲細細輕
杖鉞褰帷瞻具美
投壺散帙有餘清

自公多暇延參佐江漢風流萬古情

又作此奉衛王

西北樓成雄楚都遠開山岳散江湖二儀清濁還高下
三伏炎蒸定有無推轂幾年唯鎮靜曳裾終日盛文儒
白頭授簡焉能賦愧似相如為大夫

暮歸

霜黃碧梧白鶴棲城上擊柝復烏啼客子入門月皎皎
誰家搗練風淒淒南渡桂水關舟楫北歸秦川多鼓鞞

年過半百不稱意
明日看雲還杖藜

公安送韋二少府匡贊

逍遙公後世多賢
送爾維舟惜此筵
念我能書數字至
將詩不必萬人傳
時危兵甲黃塵裏
日短江湖白髮前
古往今來皆涕淚
斷腸分手各風煙

曉發公安

北城擊柝復欲罷
東方明星亦不遲
鄰雞野哭如昨日
物色生態能幾時
舟楫眇然自此去
江湖遠適無前期

出門轉盼已陳迹藥餌扶吾隨所之

燕子來舟中作

湖南為客動經春燕子啣泥兩度新
舊入故園常識主如今社日遠看人
可憐處處巢君室何異飄飄託此身
暫語船檣還起去穿花落水益霑巾

小寒食舟中作

佳辰強飯食猶寒隱几蕭條戴鶻冠
春水船如天上坐老年花似霧中看
娟娟戲蝶過閒幔片片輕鷗下急湍

雲白山青萬餘里愁看直北是長安

贈韋七贊善

鄉里衣冠不乏賢杜陵韋曲未央前爾家最近魁三象
時論同歸尺五天北走關山開雨雪南遊花柳塞雲煙
洞庭春色悲公子蝦菜忘歸范蠡船

酬郭十五判官

才微歲老尚虛名卧病江湖春復生藥裏關心詩總廢
花枝照眼句還成只同燕石能星隕自得隋珠覺夜明

喬口橘洲風浪促繫帆何惜片時程

遣悶戲呈路十九曹長

江浦雷聲喧昨夜春城雨色動微寒黃鸝並坐交愁濕
白鷺羣飛大劇乾晚節漸於詩律細誰家數去酒盃寬
惟君醉愛清狂客百遍相看意未闌

送辛負外

雙峰寂寂對春臺萬竹青青照客杯細草留連侵坐軟
殘花悵望近人開同舟昨日何由得並馬今朝未擬迴

直到綿州始分首江邊樹裏共誰來

清明二首

朝來新火起新煙湖色春光淨客船繡羽銜花他自得
紅顏騎竹我無緣胡童結束還難有楚女晉肢亦可憐
不見定王城舊處長懷賈傅井依然虛雷焦舉為寒食
寶藉巖君賣卜錢鐘鼎山林各天性濁醪麤飯任吾年
此身飄泊苦西東右臂偏枯半耳聾寂寂繫舟雙下淚
悠悠伏枕左書空十年蹴踘將雛遠萬里鞦韆習俗同

旅雁上雲歸紫塞
家人鑽火用青楓
秦城樓閣煙花裏
漢主山河錦繡中
風水春來洞庭濶
白蘋愁殺白頭翁

即事

百寶裝罽帶
真珠絡臂鞞
笑時花近眼
舞罷錦纏頭

絕句

遲日江山麗
春風花草香
泥融飛燕子
沙暖睡鴛鴦
江碧鳥逾白
山青花欲燃
今春看又過
何日是歸年

絕句

日出籬東水雲生舍北泥竹高鳴翡翠沙僻舞鷓雞
藹藹花藥亂飛飛蜂蝶多幽棲身懶動客至欲如何
急雨捎溪足斜暉轉樹腰隔巢黃鳥並翻藻白魚跳

八陣圖

功蓋三分國名成八陣圖江流石不轉遺恨失吞吳

復愁

人煙生處僻虎跡過新蹄野鶻翻窺草村船逆上溪
釣艇收縮盡昏鴉接翅歸月生初學扇雲細不成衣

絕句

漫道春來好狂風大放顛吹花隨水去翻却釣魚船

贈李白

秋來相顧尚飄蓬未就丹砂媿萑洪痛飲狂歌空度日
飛揚跋扈為誰雄

少年行

莫笑田家老瓦盆自從盛酒長兒孫傾銀注玉驚人眼
共醉終同卧竹根

贈花卿

錦城絲管日紛紛半入江風半入雲此曲祇應天上有
人間能得幾回聞

少年行

馬上誰家白面郎臨階下馬坐人床不通姓字麤豪甚
指點銀瓶索酒嘗

絕句漫興

眼見客愁愁不醒無賴春色到江亭即遣花開深造次

便覺鶯語太丁寧

手種桃李非無主
野老牆低還是家
恰似春風相欺得
夜來吹折數枝花

熟知茅齋絕低小
江上燕子故來頻
銜泥點污琴書內
更接飛蟲打著人

二月已破三月來
漸老逢春能幾迴
莫思身外無窮事
且盡生前有限杯

腸斷春江欲盡頭
杖藜徐步立芳洲
顛狂柳絮隨風去

輕薄桃花逐水流

懶慢無堪不出村
呼兒日在掩柴門
蒼苔濁酒林中靜
碧水春風野外昏

糝徑楊花鋪白氈
點點溪荷葉疊青
錢筍根稚子無人見
沙上鳧雛傍母眠

舍西柔桑葉可拈
江畔細麥復纖纖
人生幾何春已夏
不放香醪如蜜甜

隔戶楊柳弱嫋嫋
恰似十五女兒靨
誰謂朝來不作意

狂風挽斷最長條

江畔獨步尋花

江上被花惱不徹無處告訴只顛狂
走覓南鄰愛酒伴

經旬出飲獨空牀

斛斯融
吾酒徒

稠花亂藥裏江濱行步歇
危實怕春詩酒尚堪驅使在
未須料理白頭人

江深竹靜兩三家多事
紅花映白花報荅春光知有處
應須美酒送生涯

東望少城花滿煙
百花高樓更可憐
誰能載酒開金盞
喚取佳人舞繡筵

黃師塔前江水東
春光懶困倚微風
桃花一簇開無主
可愛深紅間淺紅

黃四娘家花滿蹊
千朵萬朵壓枝低
留連戲蝶時時舞
自在嬌鶯恰恰啼

不是愛花即欲死
只恐花盡老相催
繁枝容易紛紛落
嫩葉商量細細開

三絕句

楸樹馨香倚釣磯
斬新花藥未應飛
不如醉裏風吹盡
可忍醒時雨打稀

門外鷓鴣去不來
沙頭忽見眼相猜
自今已後知人意
一日須來一百回

無數春筍滿林生
柴門密掩斷人行
會須上番看成竹
客至從嗔不出迎

戲為六絕句

庾信文章老更成，凌雲健筆意縱橫。今人嗤點流傳賦，不覺前賢畏後生。

楊王盧駱當時體，輕薄為文哂未休。爾曹身與名俱滅，不廢江河萬古流。

縱使盧王操翰墨，劣于漢魏近風騷。龍文虎脊皆君馭，歷塊過都見爾曹。

才力應難誇數公，凡今誰是出羣雄。或看翡翠蘭苔上，未掣鯨魚碧海

不薄今人愛古人清詞麗句必為鄰竊攀屈宋宜方駕
恐與齊梁作後塵

未及前賢更勿疑遞相祖述復先誰別裁偽體親風雅
轉益多師是汝師

中丞嚴公雨中垂寄見憶一絕奉荅

雨映行宮辱贈詩元戎肯赴野人期江邊老病雖無力
強擬晴天理釣絲

投簡梓州幕府兼簡韋十郎官

幕下郎官安穩無從來不奉一行書固知貧病人須棄
能使韋郎跡也疎

奉和軍城早秋

秋風嫋嫋動高旌玉帳分弓射鹵營已收滴博雲間戍
更奪蓬婆雪外城

絕句

堂西長筍別開門塹北行椒却背村梅熟許同朱老喫
松高擬對阮生論

欲作魚梁雲復湍因驚四月雨聲寒青溪先有蛟龍窟
竹石如山不敢安

兩箇黃鸝鳴翠柳一行白鷺上青天窻含西嶺千秋雪
門泊東吳萬里船

漫成

江月去人只數尺風燈照夜欲三更沙頭宿鷺聯拳靜
船尾跳魚撥刺鳴

夔州歌

中巴之東巴東山江水開闢流其間白帝高為三峽鎮夔州險過百牢關

赤甲白鹽俱刺天閭閻繚繞接山巔楓林橘樹丹青合
複道重樓錦繡懸

灤東灤西一萬家江北江南春冬花背飛鶴子遺瓊藥
相趨鳧雛入蔣芽

東屯稻畦一百頃北有澗水通青苗晴浴狎鷗分處處
雨隨神女下朝朝

蜀麻吳鹽自古通萬斛之舟行若風
長年三老長歌裏
白晝攤錢高浪中

解悶

草閣柴扉星散居浪翻江黑雨飛
初山禽引子哺紅果
溪女得錢留白魚

商湖離別下揚州憶上西陵故驛樓
為問淮南米貴賤
老夫乘興欲東流

一辭故國十經秋每見秋瓜憶故丘
今日南湖采薇蕨

何人為覓鄭瓜州

沈范早知何水部
曹劉不待薛郎中
獨當省署開文苑
兼泛滄浪學釣翁

李陵蘇武是吾師
孟子論文更不疑
一飯未曾留俗客
數篇今見古人詩

復憶襄陽孟浩然
清詩句句盡堪傳
即今耆舊無新語
漫釣槎頭縮頸鱗

陶冶性靈在底物
新詩改罷自長吟
孰知二謝將能事

頗學陰何苦用心

不見高人王右丞
藍田丘壑漫寒藤
最傳秀句寰區滿
未絕風流相國能

先帝貴妃今寂寞
荔枝還復入長安
炎方每續朱櫻獻
玉座應悲白露團

憶過瀘戎摘荔枝
青楓隱映石逶迤
京中舊見無顏色
紅顆酸甜只自知

翠瓜碧李沉玉甃
赤梨蒲萄寒露成
可憐先不異枝蔓

此物娟娟長遠生

側生野岸及江蒲不熟丹宮滿玉壺雲壑布衣駘背死
勞生重馬翠眉須

承聞河北諸道節度入朝歡喜口號絕句

社稷蒼生計必安蠻夷雜種錯相干周宣漢武今王是
孝子忠臣後代看

鳴玉銜金盡正臣修文偃武不無人興王會靜妖氛氣
聖壽宜過一萬春

抱病江天白首郎
空山樓閣暮春光
衣冠是日朝天子
草奏何時入帝鄉

東逾遼水北滹沱
星象風雲喜共和
紫氣關臨天地濶
黃金臺貯俊賢多

李相將軍擁薊門
白頭雖老赤心存
竟能盡說諸侯入
知有從來天子尊

十二年來多戰場
天威已息陣堂堂
神靈漢代中興主
功業汾陽異姓王

喜聞盜賊蕃寇揔退口號

勃律天西采玉河堅昆碧盃最來多舊隨漢使千堆寶
少荅朝王萬匹羅

今春喜氣滿乾坤南北東西拱至尊大厯二年調玉燭
玄元皇帝聖雲孫

存歿口號

席謙不見近彈碁畢耀仍傳舊小詩玉局他年無限笑
白楊今日幾人悲

鄭公粉繪隨長夜曹霸丹青已白頭天下何曾有山水
人間不解重驂騑

書堂飲既夜復邀李尚書下馬月下賦絕句

湖水林風相與清殘尊下馬復同傾久拚野鶴如霜鬢
遮莫鄰雞下五更

江南逢李龜年

岐王宅裏尋常見崔九堂前幾度聞正是江南好風景
落花時節又逢君

御定全唐詩錄卷三十三